

# PABOJA ETEHUE'YO TESANONICA CUIÑAJJJO BA'E YASIJE EBIONEI 1 TESALONICENSES

*Pabohua esohui tehue canaje Jesusaja epeeji cuana Tesanonica cuiñajjjo ba'e yasije*

<sup>1</sup> Eya Pabo. Sinasi, Timoteo pea'ai enijje nequi. Jiquio esohui ecuaaya tehueña miqiana huasijje, ma Jesusaja epeeji nei cuana Tesanonica cuiñajjjo ba'e yasije. Miquianaya Eyacuiñajji es-eja Chii ai nijje jjapeequiani, Jesosa Quito esejaya Emeshi Mese nei nijje jjapeequiani pea'ai. ¡Eyacuiñajjiya, Jesosa Quitohua pea'ai miqianaya quea pame nee cajaanuana cahua! ¡Quea bei capo mee cahua pea'ai!

*Jesosaja epeeji cuana quea pame nee ba'yani*

<sup>2</sup> Eyacuiñajji nijje mimianijo ecuaaya oya bihuiaña miqianajo. E'e, ecuaana Eyacuiñajji nijje mimi huicha'a huicha'ani miqianajo jama ba'a:

<sup>3</sup> —Eyacuiñajji, ecuanaja Chii ai, Jesusaja epeeji Tesanonicajo ba'eca minijje jjapeequiani cuana quea pame nee nee. Miya ojaya quea boti nee nee; minijje quea pame nee chaco cani tii. Oya cuana Jesosa Quito nijje, ecuanaja Emeshi Mese nei nijje jjapee tiitiquiani quea pame nee. E'e, jjashahuabaquiani jama ba'a: “Jesosaa ecuaana ba'e tiitii mee caje'yo onijje eyajo” —jamaya ecuaana mimiani Eyacuiñajji nijje miqianajo.

<sup>4</sup> Epeeji cuana, miquianaya Eyacuiñajjija quea jea nee nee. Ohuaya miquianaya babaca majje iyaa canaje ojaya epeeji epo tiitii'yojji. Jamaya ecuanajaya eba. <sup>5</sup> E'e, ecuaaya Eyacuiñajjija esohui quea pame nee Jesusaja huohuinaje miquianajaya eshajja'ajjaji. Edojjoshahua Pameya ecuanaya sohuihuohui meesahua canaje quea ja'a nee nee; miquianaya ba mee canaje Eyacuiñajjija esohui e'e nei, dejjaja esohui pojjeama. Ecuana quea pame nee ba'enaje miquiana nijje. Jamajjeya ecuanaya miquiaaya banaje quea pame nee ba'e. Jamajjeya miquianaya ba'enaje quea pame nee ecuana jayojjaya. <sup>6</sup> E'e, miquianaya ecuana jayojjaya ba'enaje quea pame nee nee; esejaya Emeshi Mese nei jayojja jama pea'ai ba'enaje. Jamajjeya pea cuaa miquianaya cuia canaje Jesosa nijje jjapee neineiquianijojo. Jamatii miquianaaya quea bihui neeya Jesusaja esohui shajja'ajjanaje; Edojjoshahua Pameya miquianaya quea bihui nee po mee canaje. <sup>7</sup> E'e, miquianaya quea ja'a nee jjapeequinaje Jesosa nijje. Jamajjeya ojjaña Jesusaja epeeji cuana Masenonia meshijo ba'eca cuana, Acaya meshijo ba'eca pea'ai miquiana ba majje quea ja'a nee jjapeequi sa poani Jesosa nijje miquiana jayojjaya. <sup>8</sup> Miquianajaya esohui Emeshi Mese nei, Jesusajo ojjaña Jesusaja epeeji cuaa shajja'ajja canaje. E'e, Masenonia meshijo ba'eca cuaa, Acaya meshijo ba'eca cuaa pea'ai shajja'ajja canaje. Ojjaña ba canaje miquianaya Jesusaja epeeji quea ja'a nee poani. Ojjaña cuaa quea huiso meshijo ba'eya pea'ai ba canaje miquianaya Eyacuiñajjija

esohui jayojja jama po tiitiiani quea pame nee. E'e, ojjaña cuaa ojjaña meshi cuanajo ba'eya miqúanajo shajja'ajja canaje. Jamajjeya ecuaaya oya cuana huohui o'oya jjima aña. <sup>9</sup> Onaaya ca ca ecuaana huohui cani miqúanajo jama ba'a: —Jesosaja epeeji cuana Tesanonicaajo ba'e Pabaja esohui Jesosajo ebionei shajja'ajja jeahua jjashajja'ajjaquinaje quea bihui nee. Jesosaja epeeji cuana poanaje. Eyacuiñajji nisho, meshi epana'yo cuana bihuia pajea ca'yonaje. Jjeya nei ca ca oya cuana Eyacuiñajji e'e nei nijje jjapeequiani. E'e, Eyacuiñajji ca ca oe nei yani tii tii, eshe. <sup>10</sup> Ohuaya Eyacuiñajjija Bacua Ejja oe nei Jesosaja epoe o'oyajji ishoa'ajja cani —jamaya ojjaña miqúanajo poani.

E'e, Eyacuiñajjija Bacua Ejja Jesosa mano'yajo, Eyacuiñajjiya oya ba'e mee ca o'oyanaje. Jjeya ohuaya, Jesosaa esejaya mimishi cuana cuijea ca poquipoqui'yani. Jamajjeya quijje Eyacuiñajjiya eseya sosequia caje'yo jiquio meshijo ba'ya poa sosejjeya; ohuaya eseya quea nee nee epo mee'yojji pojjeama shajjama' cuana nijje.

## 2

### *Pabo chacochoa poa Tesanonica meshijo*

<sup>1</sup> Yahujajo ecuaaya Jesosaja esohui huohuinaje; miqúanaya shajjama' pojjeama poa. Chojja, shajja'ajja neinei nequiaa poa. Miquianajaya jama eba pea'ai ba'a: <sup>2</sup> Miquiana baa Tesanonica huasijje poqui jjimahua ecuaana cuia canaje Jodio cuaa Pinipo cuiñajjijo ba'eca cuaa. Ecuaana nijje mim-ijajinaje pea'ai. Pea cuaa ecuaana cuia canaje

Jesosaja esohui huohui mee ajjaa jjejojo; jamatii Eyacuiñajjiya ecuana ojaya esohui quea pame nee Jesosa Quitojo huohui meesahua canaje miqiana huasijje mete'ama, miqianajaya eshajja'ajjaji.

<sup>3</sup> E'e, miqiana huasijje sohuihuohuiañaajo ecuanajaya ejjashahuabaquijji quea ja'a nee poanaje. Ecuanaajaya esohui siajje pojjeama. Miqiana dasia sa po'yo ajja pea'ai. <sup>4</sup> Chojja. Eyacuiñajjiya eba ecuanaya siajjepojji pojjeama. Jamajjeya ohuaya ecuana huoojea canaje Jesosaja esohui quea pame nee huohuiya. Eyacuiñajjiya ejjashahuabaquijji jayojja jama huohuiaña ecuaaya. Eyacuiñajjiya eba nei nei ecuanajaya ejjashahuabaquijji ojaya ejjashahuabaquijji jayojja jama poani tii. Ecuaaya oya quea bihui nee po mee sa ña ecuana nijje. E'e pojja'a pea cuana quea bihui pojjeama ecuanaja huohui'yojo. Jamatii ecuana jjashahuabaquiani jama ba'a: —Ecuaaya esohui huohuiaña pea cuanaja ejjashahuabaquijji jayojja jama pojjeama, pea cuana enijje quea bihui epojji pojjeama —chojja, Eyacuiñajji quea bihui nee po mee sa ña ecuana nijje. <sup>5</sup> Miqianajaya ecuana eba. Esohui quea bihui nisho mimi jjima miqiana nijje miqiana dasiajji, aquiana sosema' edojjji pea'ai. Chojja, Eyacuiñajjiya eba ecuanajaya ejjashahuabaquijji quea pame nee. <sup>6</sup> Jjashahuabaqui ajja jama ba'a: —Ecuanaajaya esohui quea pame nee shajja'ajja majje ecuana cabihua cahua cuaa; aquiana caquia cahua pea'ai —chojja, ecuana jjashahuabaqui ajja pea cuanaja ebihuijji.

<sup>7</sup> Ecuana Jesosa Quitoja huoojea'yo ojaya esohui huohuijji. Jamajjeya miqianajaya aquiana

sosema' jjesHEME esohui huohuinaje sosejje. Jamatii aquiana cuana ecuanajaya jjeshe jjima poanaje. Chojja, miquiana nijje quea bei ba'enaje. Jiquio ecua enaeseya oja bacua cuana jaahuana cani, quea jea nee acani jayojjaya jama ecuaaya miquianaya anaje. <sup>8</sup> Miquianaya ecuanajaya quea boti nee nee poanijo Eyacuiñajjija esohui quea pame nee nee Jesusaja huohuinaje miquiana huasijje. Pea cuaa ecua cuia ca chana' Jesusaja esohui ehuhui poaje jjejojo. Jamatii miquianaya ecuanajaya quea jea nee nee poanijo esohui huohui tiitiinaje. <sup>9</sup> E'e, miquianajaya eba miquiana nijje nequianijo ecuaaya janobajjima nei chaco tiitiinaje eba'ejji sosejje. Eyacuiñajjija esohui quea pame nee Jesusaja huohuiañajo chaco tiitiinaje epojjajo, mecajje pea'ai. Jamaya anaje ecuaaya. Jamajjeya miquianajaya ecuaana eba'ejji quia jjima poanaje. Eyacuiñajjija esohui huohuinaje sosema' miquianajaya eshajja'ajjaji.

<sup>10</sup> Ecuaana miquiana nijje ba'enaje quea bei nee, mimishi'ama, quea pame nee, dejja tai'ama. Jamaya miquianajaya eba. Jamaya Eyacuiñajjija eba pea'ai. Jamajjeya ¿yajjajo pea cuaa ecuaana niñeba cani so'o quea dejja tai poanaje miame? <sup>11</sup> E'e, echii meseya oja bacua cuana cuiña cani quea pame nee jayojjaya jama ecuaaya miquianaya anaje. Jamaya miquianajaya eba pea'ai.

<sup>12</sup> Ecuaaya miquianaya huohui majamajanaje jama ba'a: —¡Quea bihui nee Jesosa Quito nijje jjapeequicue! ¡A'a quea yeno pojji onaa miya quea mimishi acajje! Eyacuiñajji oe nei quea ja'a nee nee, quea ca'a nee nee poani tii tii. Oya oe nei ojjaña huoojea'yojji poani. Ohuaya miquianaya

babaca canaje onijje eba'e tiitii'yoyji eyajo. Jamajjeya jayaya esohui jayojja jama ba'e tiitiicue Eyacuiñajji miquiana nijje quea bihui nee epojji!

<sup>13</sup> Ecuaya Eyacuiñajji bihuiaña miquianajo jama ba'a: —Eyacuiñajji, eyaya miya bihuiaña Jesosaja epeejji cuana Tesanonicajo ba'e quea pame nee poani yasijje. E'e, miyaya miquea esohui huohui meesahuañajo, onaaya shajja'ajja canaje. Quea bihui nee poanaje. Quea ja'a jjashahuabaquinaje jama ba'a: “E'e jojo nei Pabohua ojaya esohui pojjeama huohui cani; Eyacuiñajjija esohui quea pame ca ca huohui cani” poanaje cuana —jamaya ecuaaya Eyacuiñajji bihuia huicha'a huicha'aña miquianajo.

E'e epeejji cuana, Jesosa nijje jjapeequianijo, Eyacuiñajjija miquianaya ba'e meesahua cani quea pame nee ojaya esohui e'e nei jayojjaya.

<sup>14</sup> Yahuajo Jesosaja peejji cuana Jodio meshijo ba'e onijje, Jesosa Quito nijje jjapeequianijo, pea Jodio cuaa, oja huapa pojjeama cuaa oya cuana cuia ca poa quea huiso nee. Oya jayojjaya jjeya miquianaya Jesosa nijje jjapeequianijo, miquianajaya huapa pojjeama cuaa miquianaya cuia cani pea'ai. <sup>15</sup> E'e, yahuajo nei nei Jodio cuaa Eyacuiñajjija esohui huohuijji cuana cuiajea ca'ya poa. Majoya esejaya Emeshi Mese nei Jesosa quecua mee ca'ya poa pea'ai. Jjeya eseya cuia cani pea'ai, Jodio cuaa. Shajjamaa po tiitiiya jjejojo Jodio cuaa Eyacuiñajji quea quene po tiitii mee capoquiani. Jodio cuaa aje oe ojjaña dejja cuana quea tai acani. <sup>16</sup> E'e, ecuaaya Jodio pojjeama cuana huasijje Eyacuiñajjija esohui quea pame nee Jesosajo huohuiaña. Jodio pojjeama cuana Jesosa

nijje jjapeequi mee sa aña onijje eyajo eba'e tiitii mee'yojji quea pame nee. Jamatii Jodio cuaa aje oe ecuana Jesusaja esohui huohui pajea mee'yo sa acani tii. Jamaya oya cuana, Jodio cuana quea mimishi nee nee po tiitiiani. Jamajojoya aje jja oe Eyacuiñajji quea quene nee poani Jodio cuana nijje. Quea yeno nee nee po tiitii mee cani Jodio cuana.

*Pabo poqui o'oya sa poanaje Tesanonica huasijje*

<sup>17</sup>Epeeji cuana, yahuajo ecuana miqiuana nijje nequijo, Jodio cuana ecuana nijje quea quene nee nee poanaje. Jamajjeya miqiuana nijje nequi tiitii jjima poanaje. Jamatii miqiuanaaya ecuanajaya pajea'yo jjima. Chojja, miqiuanaajo jjashahuabaquiani tii. Poqui o'oya sa neinei poanaje miqiuana baa. Mi poqui mee ca o'oyajje ecuana quea yeno nee poanaje. <sup>18</sup>E'e jojo nei ecuana poqui o'oya sa poanaje miqiuana huasijje. E'e eya, Pabo poqui huicha'a huicha'a'ajjanaje. Jamatii Edosiquiana neiya eya poqui mee jjima acanaje. <sup>19</sup>E'e jojo nei miqiuanaaya Jesusaja epeeji poanijo, ecuana quea bihui nee nee poani. Jamajjeya esejaya Emeshi Mese nei Jesosa Quito poe o'oyajo, miqiuana onijje nequi'yajo, ecuana quea bihui nee poaje'yo. E'e, jiquio ecua se chacochoajo sosequia cajje eseya quea bihui nee poani jayojja jama ecuana quea bihui nee nee poaje miqiuana Jesosa nijje nequi ba majje. <sup>20</sup>E'e, miqiuanaaya quea pame nee Jesosa nijje jjapeequianijo, ecuaaya Eyacuiñajji bihuiaña. Quea jaji nee poani pea'ai miqiuanaajo.

### 3

#### *Pabohua Timoteo huoojea canaje Tesanonicajo ba'eca cuana ba'ajja'yohua*

<sup>1</sup> Jamajjeya miquianajo quea yeno jjashahuaba tiitiiqui majje eya jama poanaje ba'a: —E'e, eya ee nei Atena cuiñajjijo nequije. Timoteo, ¡miya poquicue Jesusaja epeeji cuana Tesanonicajo ba'e baa! —eya poanaje.

<sup>2</sup> Majoya eyaya esejaya epeeji nei Timoteo huoojeanaje miquiana baa. Timoteohua ecuana nijjeya Eyacuiñajjija esohui quea pame nee Jesusaja huohui tiitii cani. Eyaya oya huohuinaje jama ba'a: —Timoteo, ¡Jesusaja epeeji cuana quea ja'a nee, quea pame nee jjapeequi meesahuacue Jesosa nijje! ¡Oya cuana Jesusaja esohui jay-ojja jama atiitii meesahuacue quea bihui nee!

<sup>3</sup> Jamajjeya onaaya oya cuana cuia canijo, Jesosa nijje jjapeepajeaqui'yo ajja —jamaya eyaya Timoteo huohuinaje miquiana que huoojea jjimahuaa.

Jamatii miquianajaya eba pea cuaa Jesusaja epeeji cuana cuia caje'yo. Eyacuiñajjija eba eseya ojaya epeeji cuana quea ja'a poaje onaa cuia caje. Jamajjeya cuia pajea mee jjima acani. <sup>4</sup> E'e, yahuajo miquiana nijje nequiya ecuaaya huohuinaje jama ba'a: —Jesusaja epeeji poanijo pea cuaa eseya cuia caje.

E'e jojo nei. Jjeya pea cuaa miquianaya cuia cani. Jamaya miquianajaya eba. <sup>5</sup> Jamajjeya eya quea mete miquianajo poanaje. Timoteo huoojeanaje miquiana baa: —¡A'a Jesosa nijje jjapeequiani tii ba'ajjaqui'yo socue, Timoteo! —eya poanaje.

E'e, eya quea mete miqúanajo poanaje. E'e pojja'a Edosiquiana neiya miqúanaya Jesosa nijje jjapeequi pajea mee ca'yonaje. Jamaya epo'yo jojjemo, miqúanajaya Eyacuiñajji esohui epajea'yo jojjemo ecuana quea yeno pome; esohui huohuijajji pojja'a eyaya sohuihuohuijaja nequinaje.

<sup>6</sup> E'e de, miqúanaja ba majje jjeya nei Timoteo poe o'oyanaje e que. Ohuaya huohui caña'yonaje jama ba'a: —Jesosaja epejji cuana Tesanonicajo ba'e Jesosa nijje jjapeequiani tii; pajea'yo jjima. Eyacuiñajji esohui jayojja jama po tiitiiani; pea cuana quea jaja nee acani. Eya pea'ai ohuaya quea jaja nee acajjequinaje. Oya cuana ecuanajo jjashahuaba tiitiqúanaja quea pame nee. Jiquio ecua ecuanaja jjashahuabaquinaje o baquijji jamaya oya cuana jjashahuabaquiani ecuana bahuajji —jamaya eya Timoteohua huohui caña'yonaje miqúanajo.

<sup>7</sup> Jamajjeya ma shajja'ajja majje ecuana quea bihui nee poanaje. E'e de, ecuana aema' poani Jesosa nijje jjapeequianijo. Pea cuana ecuana cuia cana pea'ai. Jamatii miqúanaja ecuana quea bihui nee po meeña. E'e, miqúanaja Jesosa Quitoja esohui jayojja jama poanijo tii miqúanaja ecuana quea bihui nee nee po meeña. <sup>8</sup> E'e de, miqúanaja esejaja Emeshi Mese neija esohui jayojja jama atiitiñaajo, ecuana quea bihui nee, quea bei nee pea'ai poani. <sup>9</sup> E'e jojo nei jjeya miqúanajo ecuaaya Eyacuiñajji bihuia neineña. Eyacuiñajji ecuana quea bihui nee po mee cana miqúanaja quea pame nee onijje jjapeequianijo.

10 Jamajjeya ecuana onijje mimi tiitiiani jama ba'a: —Eyacuiñajji, ¡ecuana poqui meesahua o'oyacue ecuanaja epeeji cuana baa! ¡Ojjaña miquea esohui huohui meesahua o'oyacue onajaya eshajja'ajjaji, quea pame nee minijje ejjapeequi'yojji! —jamaya ecuana Eyacuiñajji nijje mimiani ojjaña pojajajo, ojjaña mecajje pea'ai.

11 Ecuana onijje mimi neineiani jama pea'ai ba'a: —Eyacuiñajji, ecuanaja Chii ai, Emeshi Mese nei Jesosa pea'ai, ¡che ecuana poqui meesahuacue Tesanonica huasijje miquea epeeji cuana baa!

12 E'e Emeshi Mese nei, ¡miquea epeeji cuaa Tesanonicajo ba'e cuaa pea miquea epeeji cuana quea jea nee nee ameesahuacue! ¡Ojjaña cuana pea'ai quea jea nee nee ameesahuacue! ¡Ecuaa oya cuana quea jea nee nee añña jayojjaya jama oya cuana pea cuana quea jea nee ameesahuacue pea'ai! 13 E'e Eyacuiñajji, ecuanaja Chii ai, ¡oya cuana Jesusaja epeeji cuana quea ja'a nee po meesahuacue quea boejea, mimishi'ama eba'e'yojji! Jamajjeya ecuanaja Emeshi Mese nei Jesosaa ojjaña ojaya esohuidojojji cuana nijje poe o'oya majje oya cuana mi cojja nei nequi mee caje'yo quea boejea, bicho'ama. E'e, ¡jamaya acue Eyacuiñajji! —jamajjeya eya Eyacuiñajji nijje mimi tiitiiani miquiana huasijje.

## 4

*¡Quea pame nee ba'ecue Eyacuiñajji minijje quea bihui epojji!*

1 Jamajjeya epeeji cuana, eyaya pea esohui tehueje miquianajaya ebajji. Yahujajo ecuaaya

miquianaya huohuinaje quea pame nee eba'ejji. Ma ecuanajaya esohui jayojja jama ba'yanijo, Eyacuiñajji quea bihui nee poani miquiana nijje. Jamaya miquianaya ba'enaje. Jjeya esejaya Emeshi Mese neiya, Jesosa Quitohua ecuana ma esohui tehue mee ca o'oyani miquiana huasijje quea pame tii eba'e poquijji. <sup>2</sup> Yahuajo esejaya Emeshi Mese neiya, Jesusaa ecuana huoojea canaje miquiana sohuihuohuiya. Ma esohui miquianajaya eba. <sup>3</sup> Eyacuiñajjija ejjashahuabaquijji miquianajaya eba'e'yojji jama ba'a: —¡Quea pame nee ba'ecue, mimishi'ama nei nei! ¡A'a onajaya ehuanase siijji! ¡A'a peaja yahue siijji! ¡A'a pea cojjojji pojji! <sup>4</sup> Dejja cuana, ¡miquianaya eponajo jjahuanaqui sa poanijo quea ja'a nee jjashahuabaquicue! ¡Eyacuiñajjija esohui jayojja jama epona huanacue quea pame nee! <sup>5</sup> ¡A'a quea mimishi jjashahuabaquijji Eyacuiñajjija epeejji pojjeama cuana jayojja! Oya cuana aje oe pea epona cuana nijje jaani; ojaya ehuanase jaahuana jjima acani. <sup>6</sup> Onajaya ehuanase sii canijo, e'e jojo nei Eyacuiñajjiya dejja cuana quea nee nee po mee caje'yo. Jamajjeya miquianaaya ca ca ¡a'a onajaya ehuanase siijji! ¡A'a jea bajji pea'ai! —jamaya Eyacuiñajji jjashahuabaquiani ojaya epeejji cuanajo. Jamaya yahuajo ecuaaya miquianaya huohuinaje.

<sup>7</sup> E'e, Eyacuiñajjiya eseya iyaa majje huohui canaje jama ba'a: —¡Ecuea epeejji cuana po majje ecuea esohui jayojja jama ba'ecue quea pame nee nee! ¡A'a oe quea mimishi pojji! ¡A'a oe quea mimishi ba'ejji!

<sup>8</sup> Jiquio esohui cuana Eyacuiñajjija esohui, de;

dejjaja esohui pojjeama. Jamajjeya ojjaña joya jiquio esohui cuana jayojja jama ba'e sa po'yo ajja Eyacuiñajji nijje jjapeequi sa po'yo ajja; Eyacuiñajji cajaa a'yojji poani. Eyacuiñajjiya ca ca oe ese yasi-jje ojaya Edojjoshahua Pame huoojea ca'yonaje quea pame nee eba'e meesahua'yojji.

<sup>9</sup> Miquianaaya Jesusaja pea epeeji cuana quea jea nee añajo, eyaya miquiana que esohui etehue o'oyajji pojjeama ca comajo. E'e, Eyacuiñajjiya miquianaya jjabahuejja meequi canaje ojjaña ojaya epeeji cuana quea jea nee e'ajji. <sup>10</sup> E'e jojo nei miquianaaya jamaya aña; Jesusaja epeeji cuana ojjaña Masenonia meshijo ba'e cuana quea jea nee aña. E'e, Eyacuiñajjiya esohui jayojja jama aña miquiaaya. Epeeji cuana, ¡Jesusaja epeeji oe quea jea nee nee atiitiicue! Jamaya ecuaaya miquianaya huohui neineiaña.

<sup>11</sup> Yahuaajo ecuaaya miquianaya sohuihuo-huinaje jama ba'a: —¡Quea bei ba'e tiitiicue! ¡A'a jjachichaquijji pea cuana miminaanaa ani yasijje! ¡Miquea bobijo, daquijo, eba'ejjijo pea'ai chacocue! ¡Quea ja'a nee jjashahuaba tiitiiquicue!

<sup>12</sup> Jamajjeya miquianaya aquianajji poaje; miquianaya bobi yasijje epo'yojji pojjeama bobijji po'yo majje. Pea huasijje bobijo cua ajja poaje. Jamajjeya miquianaya quea pame ba'yani ba majje Jesusaja epeeji pojjeama cuaa miquianaya shajja'ajja caje Jesusaja esohui miquianaaya huohuiañajo. Jamajjeya miquianaya quea pame ba'eje.

*Emeshi Mese nei Jesosa poe o'oyajo ojaya epeeji emano'yo cuana shequije o'oya*

<sup>13</sup> Epeeji cuana, eyaya jiquio pea esohui tehueña miqiana ba meeji e'e jojo nei Jesusaja epeeji cuanajo, ma yahuajo mano ca'ya poajo. Jamajeya miqianaya yeno'ama poaje emano'yo cuanajo. Pea cuana ca ca, Jesusaja epeeji pojjeama cuana quea yeno nee nee poani emano'yo cuana shequi'yo jjima poanijo poso.

<sup>14</sup> Eseyaya eba e'e jojo nei Jesosa mano'yajo Eyacuiñajjiya oya shequi mee ca o'oya poa. Oya jayojaya Jesusaja epeeji cuana mano'yajo, Eyacuiñajjiya oya cuana shequi mee caje o'oya. Jamajeya Jesosa poe o'yajo Eyacuiñajjiya onijje huoojea caje ojaya epeeji ma yahuajo mano'ya poa cuana. Jamaya e'e jojo nei; jamaya jjashahuabaquime eseya poani.

<sup>15</sup> E'e, Emeshi Mese neiya Jesusaa ecuana huohui ca poa jamaya eyaya miqianaya huohuiaña jama ba'a: Poe o'oya majje Emeshi Mese neiya, Jesusaa ojaya epeeji eshe nequi cuana, ojaya epeeji yahuajo emano'yo cuana nijje ojee jjequisohua caje'yo onijje eyahuasijje. <sup>16</sup> E'e, Emeshi Mese nei Jesosa eyajo ani meshi yasijje poe jeahuajo janobajjima nei taaaje; esohuidojojji jaahuana-jjiya quea ca'a nee neeya emiajji mia cani jayojja taaame poaje, janobajjima nei nei. Eyacuiñajjiya emiajji mia caje cuaa pea'ai. Majoya Emeshi Mese nei eyajo ani jjapashineijje nequioqueje bo biajje nequi. Jamajeya ojaya epeeji cuanaja, ma yahuajo mano'ya poaja eyami eshe po mee caje o'oya, eyacua. <sup>17</sup> Majoya poe o'oya majje, emano'yo cuanaja eyami eshe o'oya po mee majje Jesosa Quitohua ojaya epeeji eshe nequi cuana bo biajje jjequisohua caje'yo emano'yo cuana nijje,

ojee. Bo biajje nequije Jesosa nijje. Majoya ojjaña ojaya epeeji cuana onijje ba'e tiitiije'yo Emeshi Mese nei nijje, Jesosa nijje. <sup>18</sup> Jamajjeya jiquio esohuijo quea bihui nee nee pocue! ¡Jesosaja pea epeeji cuana quea bihui nee po meesahuacue! ¡Jiquio esohui cuana huohui huicha'a huicha'acue! Jama ba'a: —Jesosa ojjaña ojaya epeeji cuanaja eyami eyacua po mee majje jjequisohua caje'yo eyahuasijje onijje eba'e tiiti'yojji, ojaya epeeji yahuajo mano'ya poa cuana nijje pea'ai.

## 5

*¡Jesosaja epoe o'oyajjijo jjashahuaba tiitiquicue!*

<sup>1</sup> Epeeji cuana, ¡shajja'ajjacue mo oe! Jesosaja epoe o'oyajji miqúanajaya eba. Jamajjeya eyaya miqúan huasijje etehuejji pojjeama ache pojajajo oya poeje o'oya ebajo ese. <sup>2</sup> Chojja, ¿ache pojajajo shai poeje o'oya Jesosa? Emeshi Mese nejja epoe o'oyajji esejaya ba jjima epojja. Jiquio ecua si-ipojji quehuajje poecuajiani jayojja jama Jesosa quehua poecuajije o'oya. <sup>3</sup> O poe jjimahuajo pishana mimishi cuana jama poaje ba'a: “Oj-jaña quea bei poani. Ecuana quea pame nee ba'e tiitiije'yo” onaa jama po'ajjaquijo tiya Jesosa Quito poeje o'oya. Mimishi cuana quea nee nee po mee caje'yo. E'e, Jesosa poe o'oyajo chama'ejja'aniquehuaquijji poaje. Jiquio ecua epona cuana bacua nee cuajiani jama poecuajime poaje Jesosa.

<sup>4</sup> Ecua epeeji cuana, miqúanaya Jesosa nijje jjapeequiani. Jamajjeya ¡quea ja'a nee jjashahuabaquicue! ¡Jesosaja epoe o'oyajji

ishoa'ajja anicue! Jamajjeya jiquio ecua siipojji chamajo poso equi jaahuana ajja jayojja jama a'a pojji! ¡Jesosaja epoe o'oyajji ishoa anicue! <sup>5</sup> Ojjaña miquiánaya onijje jjapeequiani; quea ja'a nee nee ba'yani, epojjajo quea ja'a poquiani jayojja jama poani. E'e, eseya eshahua nijje poquiquehua ajja. ¡Joya ecua eshahua quea mimishi poani jama a'a pojji! <sup>6</sup> Pea cuanaa ca ca Jesosaja epoe o'oyajji ishoa ajja. Jamaya pojjeama eseya. Chojja. ¡Jesosaja epoe o'oyajji ejja'ishoa'ajjaqui! ¡Quea ja'a nee ejjashahuabaqui pea'ai!

<sup>7</sup> Shajjama' cuana quea jjashahuabaqui quehua poani Jesosaja epoe o'oyajji ishoa ajja. Quea jjashahuabaqui quehua poanijo shajjama' cuana quea mimishi ba'yani. E'e, jiquio ecua mecajje huoo majje shajjama' cuana jjashahuabaqui ajja jayojja jama onaya Jesosaja epoe o'oyajji jijo jjashahuabaqui ajja. <sup>8</sup> Eseyá ca ca, Jesosaja epeejji cuana quea ja'a nee ba'yani Eyacuiñajjiya esohui jama. Quea ja'a nee jjashahuabaqui. Jamajjeya Jesosaja epoe'yojji ishoa'ajjaña. E'e, jiquio ecua sohuinanohua baa daqui quea moo ese'ojje huosho cani onaja quecua jjima yajji jayojja jama eseya Jesosa nijje jjapeequiani. ¡Pea cuana quea jea nee nee ejja'aqui pea'ai! Jamajjeya Eyacuiñajjiya eseya Edosiquiana nei jeabichajea meesahua caje. Jiquio ecua sohuinanohua ejaahuojja ca'a, baajee sapajo iya cani onaja sapa jaja jjima yajji jayojja eseya Jesosa nijje jjapeequiani; esejaya eba Eyacuiñajjiya eseya mimishi cuana cuijea'yo majje ba'e tiitii mee caje'yo onijje eyajo. <sup>9</sup> ¿A'a Eyacuiñajjiya eseya babaca canaje cuaqui yasijje quea nee epo'yojji? Chojja.

Esejaya Emeshi Mese nei nijje, Jesosa Quito ni-  
 jje jjapeequianijo, mimishi cuana cuijea majje  
 Eyacuiñajjiya eseya ba'e tiitii mee caje'yo oni-  
 jje. <sup>10</sup> E'e, Jesosa Quito eseja mimishijo mano'ya  
 poa. Jamajjeya eseya onijje ba'e tiitii mee caje'yo  
 eyajo. E'e pojja'a o poe o'oya jjimahuajo eseya  
 manoje'yo. E'e pojja'a oya poeje o'oya ese eshe  
 nequijo. Jamatii ojjaña eseya onijje ojee ba'e tiiti-  
 ije'yo eyajo.

<sup>11</sup> Jamajjeya ¡jiquio esohuijo quea bihui nee nee  
 pocue! ¡jiquio esohui huohui huicha'a huicha'acue  
 Jesusaja epeeji cuana quea bihui nee epojji! ¡Oya  
 cuana Jesosa Quito nijje quea jaji nee jjapeequi  
 meesahuacue pea'ai! Jamaya miquiaaya aña; ¡ja-  
 maya oe atitiicue!

*Pabohua eba'eji quea pamejo tehue canaje*

<sup>12</sup> Epeeji cuana, jjeya eyaya pea esohui  
 tehueña miquianaja ebajji jama ba'a: ¡Jesusaja  
 epeeji etii cuana miquiana nijje nequi  
 shajja'ajjacue oe! Ohuaya miquianaya jaahuana  
 cani, Eyacuiñajjija esohui huohui cani pea'ai.

<sup>13</sup> Oya cuana Eyacuiñajjijo quea pame nee  
 chacochoanijo ¡quea boti nee acue! ¡Quea pame  
 nee jjashahuabaquicue onajo pea'ai! ¡Ojjaña  
 Jesusaja epeeji cuana nijje quea bei pocue!

<sup>14</sup> E'e epeeji cuana, jama acue pea'ai ba'a:  
 Jesusaja epeeji quea huea poanijo, ¡janobajjima  
 nei onijje mimicue! ¡Epeeji quea mete cuana  
 quea bei po meesahuacue! Epeeji eshahua  
 nijje poquiquehua sa poanijo, ¡quea ja'a ba'e  
 meesahuacue! ¡Tecue'ama po tiitiicue ojjaña  
 cuana nijje! <sup>15</sup> Onaa miya napa cajje ¡a'a

jjasoseaquiiji! ¡A'a onaya napa pea'aiiji! ¡Ojjaña pojajajo jjashahuaba neineiquicue ojjaña Jesusaja epeeji cuana nijje, pea cuana nijje pea'ai quea pame nee epojji! <sup>16</sup> Jesusaja epeeji poanijo ¡quea bihui nee po tiitiicue! <sup>17</sup> ¡Eyacuiñajji nijje mimi huicha'a huicha'acue ojjaña pojajajo! <sup>18</sup> Miquianaya quea pame ba'yanijo, quea camaja miquianajo poanijo pea'ai ¡jamatii Eyacuiñajji bihuicue oe! Jamaya Eyacuiñajjija ejjashahuabaqui'yojji miquianajo, Jesosa Quito nijje jjapeequianijo.

<sup>19</sup> Edojjoshahua Pame minijje mimianijo, ¡a'a shajjama' pojji! <sup>20</sup> Eyacuiñajjija esohui huohuijjiya esohui huohui canijo, ¡shajja'ajja neineicue oe! <sup>21</sup> ¡Jamatii ojjaña esohui shajja'ajja neinei majje quea ja'a jjashahuabaquicue! ¡Esohui e'e nei jama acue! <sup>22</sup> ¡Ojjaña mimishi cuana pajea neinei'yocue! E'e, ¡quea pame nee nee ba'e tiitiicue!

<sup>23</sup> Jamajjeya eya Eyacuiñajji nijje miquiana huasijje mimiani jama ba'a: —Eyacuiñajji, miyaya ojjaña quea bei po tiiti meeaña. ¡Miquea epeeji cuana minijje jjapee neinei qui meesahuacue quea bojea nee epo'yojji! ¡Oya cuana ba'e meesahuacue quea pame nee nee, mimishi'ama: ojaya ejjashahuabaquiiji, ojaya eyami pea'ai, ojaya edojjoshahua pea'ai! Jamajjeya ecuanaja Emeshi Mese nei Jesosa Quito poe o'oyajo oya cuana bicho'ama, mimishi'ama poaje'yo —jamaya eya mimiani Eyacuiñajji nijje miquiana huasijje.

<sup>24</sup> Eyacuiñajjiya ojaya esohui miquiana nijje epajea'yojji pojjeama tii tii. Ohuaya miquianaya iyaa

canaje onijje ejjapee tiitiqui poquijji. Jamajjeya ohuaya miquianaya jjapeequi tiitii mee caje'yo quea pame nee nee.

<sup>25</sup> Ecuea epeeji cuana, ¡Eyacuiñajji nijje mimicue ecuanajo, ejo pea'ai!

<sup>26</sup> Ojjaña Jesusaja epeeji cuana nijje quea bihui nee mimicue jama ba'a: —Pabo miquianajo jjashahuaba tiitiquiani; quea jea nee nee pa mi Pabaja.

<sup>27</sup> Eyaya Emeshi Mese nei Jesusaja esohui huohuijji poaniya miquianaya huohuiaña jama ba'a: ¡jiquio ecuea esohui etehue'yo ojjaña Jesusaja epeeji cuana huasijje huohuicue, ojjaña tii! Jamaya.

<sup>28</sup> ¡Esejaya Emeshi Mese neiya Jesosa Quitohua miquianaya quea pame nee cajaanahua cahua!

Mahuiso. Eyaya Pabohua jiquio esohui tehue'yonaje. Apoa.

## **Eyacuiñajjija Esohui** **New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

### **Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Ese Ejja

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

---

PDF generated using Haiola and XeLaTeX on 11 Nov 2022 from source files  
dated 29 Jan 2022

88838088-e20d-51ca-8c91-69194f5ae678